

Qanoq iliornikkut sulinerup imminut akilersinnaasunngorlugu aaqqiivigineqarnissaa, isumaginnikkullu ikiorsiissutit sulileqqinnissamut aporfijunnaarlugit aaqqiivigineqarnissaat pillugu apeqquteqaat aallaavigalugu oqallinnissamik siunnersuut.

(Inatsisartuni ilaasortaq Anthon Frederiksen, Partii Naleraq)

Akissutitut allakkiaq

(Inuusutissarsiornermut, Suliffeqarnermut, Niuernermit Nunanullu Allanut Naalakkersuisoq)

Sulinissamut piareeqqasut sapinngisamik siamasinnerpaamik suliffeqalernissaat, taamaallillutillu imminnut pilersulernissaat qanoq pitsaanerusement qulakkeernissaa pillugu oqallinnissamut siunnersuut Naalakkersuisut qujassutigaat.

Innuttaasut piffissami suliffissaaleqinngiffimmi suliffissaaleqinermi ikiorsiissutisisut imaluunniit pisortanit ikiorsiissutisisut nalinginnaasumik aningaasanik pisaminnik utertisisarnissaat *ileqquunngimmat*. Pisortanit ikiorsiissutit pillugit Inatsisartut peqqussutaat nr. 15, 20. november 2006-imeersumi § 27-mi allassimavoq aningaasat utertinnissaat pillugit kommunalbestyrelse *aalajangiisinnaasoq*, aatsaalli eqqunngitsunik paasissutissiimappat, innuttaasoq kingusinnerusukkut taarsiivigineqarpat, imaluunniit aningaasqarnermigut akisussaasuusimangippat. Taamaalliluni pisortanit ikiorsiissutisiorpasuaranut aningaasarsiat allagartaat siulliit takkunneranni pisortanit ikiorsiissutit utertarinissaat pineqarneq *ajorpoq*.

Taamaattorli pisortanit ikiorsiissutit tamakkiisut ikinnerpaamik aningaasarsianut qanittuaraammata inuit ilaannut sulinissaq taamaallaat annikitsuinnarmik akilersinnaasartuummat atuuffinnik allarpasuarnik, ilaatigut isumaginninnermi ikiorsiissutinut aalajangersimasunut tulluuntuunngitsutut iluserititanut atasunik misissuinerikkut suliffeqarnerup *tamatigut* akilersinnaanissaata qulakkeerniarneranik Naalakkersuisut suliaqarput.

Tassaapput Napatitsinissamut Siuariartornissamullu Pilersaarummi takkuttussami Naalakkersuisut misissorniagaasa ilaat, tassani aamma appasinnerpaanik isertitalinnut aningaasarsiaqartuusunut qanoq pissutsit pitsanngorsaavigisinnaanerinik piviusunik inasutunik saqqummiussaartoqassalluni, ilanngullugit suliffeqarnermi ilanngaatisaqq, meerartalittut ilaqutariinnut pissutsit pitsanngorsarnissaat, aammalu pisortanit ikiorsiissutisarfip misissugarinissaa.

Suliffeqartitsinermit periusissiaq ”Suliffeqarfik toqqissisimanartoq” suliffissaaleqinerup annikillissarnissaanut suliniutinik 16-inik imaqartoq nunatsinni sulisartut pikkorissaaganissaannik annertuumik sammisaqarpoq. Pikkorissaaneq ilaatigut najukkami sulisartut

najukkami suliffinnik isumaginnissinnaanissaannik qulakkeerinneqataassaaq, aamma ilinniagaqarsimanngitsunut atorfiit ikilinerisigut, aammattaarli tassaavoq periusissiaq sulisartut siunissami aningaasarsianut annikinnerpaanut naleqqiullugu qaffasinnerusumik aningaasarsiaqartitsisunik atorfittaarnissaannut isumaginnittussaq, taamaalillutik pisortat ikiorsiissutaannit pisassanut naleqqiullugit annertunipilussuarmik aningaasarsiaqarsinnaa-tilerlugit.

Suliffeqarnerup akilersinnaalersinnissaanik sulerusussutsillu annertusarnissaanut apeqqutit arlalippassuarnut tunngasuunerat misissuinerit suliarisat arlallit aamma takutippaat: Suliffissaqarfanni inissanik pissarsinissaq; pilersuisunut kisermaanut unammillerfissanik soorlu unnukkut unnuakkullu meeqqanik paarsisussarsiornerit; ilaqtutaminnik isumaginninnissaminnut sulinermi piffissaqarnissamik sulisartut pisariaqartitaannik naapertuuttunik suliap aqqissuunnissaa; suliffimmi atugarissaarnerup annertusinissaa; sulisuni inuttut ajornartorsiutinik iluarsiinissat, aamma sulinermi atugassarisat pitsaasut qulakkeernissaat.

Maannakkut Sisimiuni Royal Greenlandip suliffissuaqarfiani ingerlanneqartumi sulisartut, aalaakkaassuseq, suliffiusumilu kultureqarneq pillugu misissuinermi Inuussutissarsiornermut, Suliffeqarnermut Niuernermullu Naalackersuisoqarfiup maannakkut tapersiivigaa. Misissuinerit naammassinissat maanna utaqqimaarpagut.

Sapinngisamik amerlanerpaat aningaasaqarnermikkut imminnut pilersugarinissat uagut aningaasaqarnitsigut siunissatsinnut tamakku tunngavigisassat ilagimmatigit unammillerfissat tamakku assut pingaartillugit isigaakka, taamaattumillu oqallinnissamut qilanaarpunga.